

DISSERTATIVNCVLA

DE SENTENTIA

PAULINA


Rom. 7. à comm. 14.

*In quâ ostenditur Paulum de se loqui re-
genito, non autem in personâ hominis
nondum regeniti.*



OXON.

Typis L. Lichfield, Acad. Typog. Prostant venales
apud Fran. Oxlad sen. M. DC. LXXIV.



UANDOQUIDE MEò confidentiæ processerit Author Harmoniæ, ut sententiam quæ Paulum astruit de se loqui *Rom. 7.* à comm. *14.* non modò sibi minùs placere (æquiùs ferendum hoc esset) verùm etiam *gravibus incom-*

modis (parum & hoc est) quin & *absurditatibus*, Harmon. A. postol. D sser. poster. c. 9. 9. 7. iisque planè *palpabilibus* laborare pronuntiaverit, visum est cum breviusculo tantæ *passivæ* examine opus hoc nostrum in præsentia claudere; idque præcipuè, quòd ad Fidelium solamen permagni referre censeam.

Primùm autem, utinam seriò secum ante perpendisset (sitamen, quod puto, novit) in quot & quanta nomina gravis hujus invidiæ procella præceps decadat. Quid enim si unum forte aut alterum Theologum *neotericum* (quanquam & *eximium*)

eximium) nonnullos etiam ex Veteribus, sibi suffragantes habeat? An ergo tot reliquos (*doctrinâ, iudicio, pietate* pares saltem) eâ statim cranii teneritudine affectos sequetur, ut *absurditatibus planè palpabilibus laborent*? Bona verba quæso, quique induit loricam, ne gloriatur ut is qui exiit.

* De Gratia
Christi. c. 39.

Inter harum scilicet absurditatum patronos post excitatam à Pelagio curam & ἀρχινοίας omnes 1^o reperiri Patres, & potissimum Latinos (adjuncto etiam Hilario ante Pelagium) valde suspicor. Ipse quidem Pelagius (haud optimæ in Ecclesiâ Dei memoriæ) ab istis sibi admodum cavuit *absurdis*, quippe qui, referente* Augustino, falsò scripsit, *omnes Ecclesiasticos Viros asserere, Paulum hæc in Peccatoris, & sub lege adhuc positi, personâ dixisse*. Hoc autem mordicus tueri Istius *Gratie contemptoris* maximè interfuit, quo magnæ suæ *liberi arbitrii DIANÆ* meliùs prospiceret. Is enim (quod passim ex Augustino liquet) asseruit, ad perfectè implenda Dei præcepta sufficere *Voluntatem* humanam adjutam solummodò lege; proin valdè commodum ei futurum vidit, ut hoc cum hujusmodi dictis isto capite circumfusis, *Quod volo non ago, sed quod nolo, &c.* à viro sanctissimo ad alium aliquem trajiceret. Valde, aio, *commodum*, non simpliciter *necessarium*; cum etiamsi de homine irrogenito intelligatur Paulus, Hæresi Pelagianæ id quoque prorsus adversetur. Nam utrobique claris convellitur instantiis, voluntatem ad bonum perficiendum non semper *sufficere*: sive enim dicat Paulus regnitus,

genitus, sive alius, *Quod volo bonum non ago*, palam est corrumpere Pelagii sententiam. Interim verò haud ita tardum hebetemque fuisse Hæresiarcham judicemus, ut quanto gravius ei periculum à diversâ interpretatione immiheret, minime prospiceret. Dato enim, quod neque Paulus ipse, quod *vel maximè* voluit, bonum perfecit, Paulus, inquam, non lege modò, sed Evangelio, sed Gratiâ, eâque *singulari* munitus; quanto hoc minus ab homine nondum *renato*, vitiis immerso, sperandum fuerit, nemo non videt. Hinc etiam commoniti Patres, Hieronymus, Augustinus, Prosper, alique, re melius expensâ, hoc quoque erroris Pugili detraxere scutum.

Quod dicimus, in Hieronymo & Augustino manifestum dabimus, quorum uterque in hoc negotio idem olim cum Pelagio senserunt, sed cavillis ejus plenius expergefatti (salvâ tantis nominibus reverentiâ) sententiam piè mutârunt: siquidem Hieronymus in Epist. ad Algasiam qu. 8. comment in *Dan. 3.* & *Habac. 1.* Paulum eò loci *personam* induisse palam asserit; ubi verò cum Pelagianâ colluvie in acutis istis Dialogis conferendæ manus, stylum vertit. Quippe dicta ista Paulina *Rom. 7.* contra Pelagianos in aciem educens, ita excipitur à Critobulo, *Mirror te hominem prudentem sic intelligere Apostolum, ut eum ex personâ suâ, & non ex aliorum dicere sentias;* quod ille tamen in Responso, ut rectè dictum, tuetur. Idem de Augustino abundè constat, qui quidem in prioribus scriptis de Paulo *non ipso,*
sed

Contra Pelagian. l. 2. haud procul ab initione.

*Quest. 1^a.
ad Simplician.
lib. 81. qn. 66.*

sed personam agente veteris hominis & sub lege constituti, in quo peccatum regnaret, ista interpretatus est. Re tamen accuratius exploratâ (non ex calore aut irâ in Pelagium, uti visum est viro cuidam Cl. durius interpretari mitissimum sanctissimumque Patrem) in veriore retro cedit sententiam, idque multis in locis. Nos unum solummodò excerpimus, ad rem maximè pertinentem, contra Julian. lib. 6. cap. 11. his verbis. *Non enim ego solus aut primus intellexi istum locum, quo evertitur hæresis vestra, quemadmodum verè intelligendus est, imò verò ego prius aliter intellexeram, vel potius non intellexeram, quod mea illius temporis etiam scripta testantur. Non enim mihi videbatur Apostolus & de seipso etiam dicere potuisse, Ego autem carnalis sum, cum esset spiritualis, & quod Captivus duceretur sub lege peccati, quæ in membris erat ejus. Et mox, sed postea melioribus & intelligentioribus cessi, vel potius (quod fatendum est) Veritati, ut viderem in illis vocibus gemitum esse sanctorum contra carnales concupiscentias dimicantium. Et continuò fere, Hinc factum est ut ista sic intelligerem quemadmodum intellexit Hilarius, Gregorius, (Nazianzenum loquitur) & cæteri Ecclesiæ Sancti notique Doctores. Verba, quæ optimi Patris modestiam singularem cum pari pietate & Veritatis observantiâ conjunctam (raro, proh dolor, exemplo) tota spirant, exprimuntque. Idem brevius, Retract. l. 1. c. 23. & l. 2. c. 1.*

*Originem, Chrysostomum, Theodoretum, ali-
osque*

osque patres Orientales quod attinet, palam est de *Origene* quod multò antè diem obierit, quàm pestis illa Pelagiana terras invaderet. Facto cessit *Chrysostomus*, sub ann. Christ. 410, viginti amplius annis ante mortuum *Augustinum*, quem constat senem scripsisse contra *Pelagium*: necdum è latibulis suis prorepserat iste vulpes, nisi venerando Patre exulante, & post biennium defuncto, uti ex *Baron.* habemus ad Ann. 405. 407. *Theodoretus* quidem triginta annis, & amplius, supervixit *Augustino*, Vir sanctus, & in Scripturarum lectione probè versatus. Cui non obijciam cum *Greg.* de Valentia censuram, quàm in Concilio Oecumenico Ephesino notatum legimus, sed illi tantum opponam dissentientium multo plures, quod ex ipso quoque *Augustino* jam audivimus, *Ceteros* scilicet *Ecclesiæ sanctos*, notosque *Doctores*.

De Transubst.
c. 8. p. 390.

Inter Pontificios, qui Thomam sequuntur, cum eo indubiè ab *Augustino* stabunt. Sic enim ille; *Dicendum, quod sicut Augustinus dicit in Retractat. Apostolus loquitur ibi de homine jam redempto, qui liberatus est à culpâ. Locus, quem intelligit Rom. 7. 27. Cum illo quoque faciunt haud pauci ex Modernis, itemque Jesuitis in loc. Salmero, Pererius, Corn. à Lap. (quique, cum talis sit, utinam noster esset) Estius Duaci Professor,*

Aquin. 12. q. 83. 1. 1m. quamvis autem in Rom. 7. 14. dicat, verba, Ego sum Carnalis, utroque modo exponi, præfert tamen sententiam quæ homini tribuit regenerito. Ver-

itas autem 17. & 18. negat de alio posse intelligi, nisi extortè. Ita ut frustra sit Jac. Arminius, dum hac illuc se versat, quo mentem Thomæ perinvet; quod & ipse sentit, p. 101. contra Doctorem Ipsum disputare maluerit, in Rom. 7. part. 2. p. 117.

cum

cum multis alijs. Imò valdè mirari subit quemvis Pontificium à tempore *Concil. Trident.* aliter sentire, nedum quæ sentit proloqui audere (quod facit inter alios aliquos Cardinalis *Toletus*) & quomodò cum lepidissimâ *Infalibilitatis comœdiâ* quadrabit. Catechismus enim Rom. Decreto illius Concilii, & Pii quinti jussu editus, Liber in quâ Schola loquitur Apostolica, & post Sacras Script. opus manibus maximè volvendum, uti monet *Andr. Fabric. Leodius* in Epist. nuncup. ei præfixâ; is, inquam, Catechismus Paulum ibi de se loqui *διὰ τῆς χάριτος* astringit, part. 4. c. 12. in Oration. Domin. petit. 4. Ubi ad hoc quæsitum, *Etiâ mne justificatis, qui jam Deo parent, usurpanda fuerit hæc precatio*, inter multa alia notatu haud indigna, sic respondet, quippe cùm eorum, qui justificati sunt, *mentem* sanet Dei gratia, non etiam *carnem*, de quâ scripsit Apostolus, *scio enim quia non habitat in me, hoc est in carne meâ, bonum*, &c. securi profectò sumus ab Ecclesiâ Romanâ: nam de *Apostolo* & *regenito* loqui constat, cùm de tali, non alio, instituatur quæstio, & ad talem disertè accommodatur responsum.

Scriptores si consulantur Reformati, vetustiores plerique omnes in eandem nobiscum sententiam pedibus eunt. Neque enim Bucerus, qui contra nos à viro Cl. objicitur, de homine prorsus irregenito Paulum intelligit, sed potius de *recens* converso, & cupiditatibus nondum probè subactis; quod monuit etiam Rivetus in Apol.

Jacobus

Jacobus quidem Arminius à partibus stat contrariis ; quas & acriter defendit, pro eo quo polebat acumine. Quòd si *causa* justa haud fuerit, parùm coridiè videmus valere *acumen* ; nil enim possumus adversus *VERITATEM*. In Rom. 7.

Sed an tacet Ecclesia Anglicana ? Audiamus Artic. 9. *Peccatum originis non est, ut fabulantur Pelagiani, in imitatione Adami situm, sed est vitium & depravatio naturæ cujuslibet hominis ex Adamo naturaliter propagati, quâ fit ut ab originali justitiâ longissimè discedat, & caro semper adversus Spiritum concupiscat, unde in unoquoque nascentium iram Dei, atque damnationem meretur. Manet etiam in Renatis hæc naturæ depravatio, quâ fit ut affectus carnis, quem alibi æternua caput, &c. interpretantur, legi Dei non subjiciatur. Et quanquam Renatis & credentibus nulla propter Christum est condemnatio, peccati tamen rationem in se habere dicit Apostolus. Totum fere Articulum dedi, cum sequentia ex Antecedentibus omnino pendeant.*

Quatuor hîc evidentissimè vult Art.

1^o Peccatum Originis depravationem esse naturæ ab Adamo propagatæ cujuslibet hominis.

2^o Per hanc depravationem hominem ab originali justitiâ quàm longissimè distare, ad malum suâ naturâ propendere, carnem adversus spiritum semper concupiscere, &c.

3^o Ipsammet hanc depravationem manere in Renatis.

4^o Hoc fateri Apostolum, intelligens *Paulum*. Ad locum sanè (*Caput* scilicet & comma) non expressè dirigit, quod neque in ullo alio Articulo facit. At ubi, quæso, potiùs quæremus, quàm in hoc ipso cap. 7. ad Rom. ubi *septies* saltem depravatio ista originalis *peccatum* nuncupatur? Nam quòd ibi de peccato *actuali* non agat Apost. res manifestior est, quàm ut prolixâ probatione indigeat;

1^o siquidem est peccatum, quod omne genus concupiscentiæ operatur, vers. 8. hoc autem peccato *actuali* tribuere perabsurdum foret, cùm concupiscentiæ sit peccatum *actuale* operari, non hujus illam, ea semper antecedit, hæc sequatur.

2^o est peccatum *inhabitans*, v. 17, 20. quod ibidem peccato *actuali* tribuere nulla sustinebit ratio; illud enim cùm sit *actio* aliqua, aut saltem voluntaria actionis omissio, naturæ *transcendentis*, non *inhabitantis* esse, perspicuum est. At peccatum hoc Originis in renatis etiam, adeoque in *se ipso*, manere fatetur Paulus, si fides Ecclesiæ; itaque secundum illius mentem, Paulus ibi *de se*, ut *regenito*, loquitur, non de alio, non de se *non dum renato*. Si quis autem ad aliam Pauli aut Epistolam aut Caput respexisse Ecclesiam contendat, frustra erit; nullum enim reperiet sensum Art. usque aded spirantem, ubi nimirum asserit quòd depravatio ista *ex se peccati naturam* habeat: ast eo capite *septies* saltem (uti diximus) *peccatum* appellatur. Quod enim eodem Art. citentur Verba Epist. ad Gal. c. 5. v. 17. si
totus

totus iste versiculus perlegatur, ejusdem omnino sententiæ nemo non deprehendet cum cap. 7. Epist. ad Rom. v. 19. nam priore loco sic dicit, *Caro concupiscit adversus spiritum, & hic adversus illam, ita ut non possit facere quæ vultis*; posteriore, *Bonum, quod volo, non facio, sed malum, quod nolo, facio*; quis non accuratum hîc videt parallelismum? perinde est igitur, utrum hic an ille sumatur locus, constat de Ecclesiæ sensu; quòd scilicet peccatum istud quo homo *suapte naturâ propendit ad malum, quo caro concupiscit adversus spiritum*, maneat in regenitis, consequenter autem in Paulo; unde demum liquidò efficitur ex mente Articuli, Apostolo nihil opus fuisse in isto cap. 7. ad Rom. aliam quàm suam Ipsius, suam *regeniti* personam induere.

Nunc autem qui & quales sint quorum *absurditatibus planè palpabilibus* labores sententia, plus satis constare puto, quamque periculosum sit ut in re magnâ triumphos quis agat prius quàm exercitum conscripserit simul & lustraverit.

Expendamus interim quid tali censurâ dignum protulit Harmoniæ Author. Et 1^o inquit *supponit Apostolum sermonem hîc interserere prorsus plane à πρὸς λόγους, &c.*

Hoc autem *ἀπὸς λόγους* exinde colligit, quod omnino absurdum atque abhorrens est Apostolum objectionibus ex legis inefficacitate in iis qui gratiâ Evangelii carent, descriptione & representatione status sui sub Evangelio respondere. Omnino absurdum atque abhorrens! Audimus. sed parcatur

quæso stimulis. Imo nonne potius absurdissimum est (coactus loquor) valdè *juvenem*, uti loquitur Ipse (cum ista scripserit) somnare veteranis tot Theologis (ut taceam Ecclesiæ Anglic. iudicium) *perspectum nihil de scopo apostoli* & aut si fuerit, *magni* talem fecisse objectiunculam? Quî, quæso, potuit Apostolus Homines *ispequeantur* (licet omnis veræ pietatis expertes) ad Evangelii gratiam & Justitiam efficacius invitare, quàm suo Ipsius exemplo? Qui cum Ipse olim sub lege fuerat, nihil profecit, donec in Gratiâ Evangelii per Fidem reciperetur. Hocine tam absurdum, ut quis alium ferreis catenis vinctum, & in carcere squalidum, ad ambiendam libertatem proposito servitutis horrore, Libertatis dulcedine, excitaret? Quod autem de statu *militiæ* suæ contra carnem annectitur, cum *certâ* tamen spe *vi-ctoriæ*, id magis facit ad pugnam strenuè subeundam, cum quod *inefficax* legis rigor non potuit, potest *efficacissima* Evangelii gratia.

P. 184.

Quod verò mox quærit, quænam idonea ratio vel fingi potest, cur statuamus eum in v. 14, & 15. mutare institutum (i. e. cum de Se ut *re-genito* ibi loqueretur) Responsurus erat Paulus, uti ait, *ad istam object. v. 13. rem esse miram, ut lex ea que sancta & bona est causa mortis cuiquam esse possit: & ad eam objectionem dissolvendam quid inquit faciunt versus sequentes?* Quam facile pronuntiat præjudicata temeritas! quas tenebras in Sudo facit? Nonne ipso eodem commate 13. nodum exhibet eundem & plenè solvit, ostendens

dens mortem non esse filiam *Legis*, sed *Peccati*? Sed verba, inquit, versus 14. *manifestam antecedentium rationem continent, ut ex causativâ partit. rãt liquet, & hoc ni detur, sermonis Apostolici seriem arenam sine calce reperiēs.* Moniti igitur caveamus, & quod vult totum maturè demus, quò saltem Apostoli Ipsius periclitanti famæ consulamus.

Nec magni res est negotiū. Quid enim clariùs quam Apostolum in toto sermone ab initio Epistolæ ad fin. cap. 7. id unum, (aut in primis) agere, ut Peccatores à se ad Christum abducant, à suâ operum Justitiâ, ad illam quæ est per fidem in Christo? Quod ut facilius expediret, ostendit 1^o Legis eum esse *rigorem*, ut nulla ad salutem admittat opera, quibus vel *minima* peccati labes adhareret; frustra itaque ex Lege sperari vitam. 2^o Eam quoque vim Legis esse *lethalem*, non quidem ex naturâ suâ, sed ex vitio omnibus innato, ut detegendo peccatum magis exulceret, & ad rebellionem stimulet. Hoc hujus Capituli negotium. Quærit itaque v. 13. *Num quod bonum (Legem intelligit) factum est mihi lethiferum? absis; sed peccatum quo appareret esse peccatum, &c.* De quo autem peccato loquitur, nisi *Originali*, & *inhabitante*? v. 17, 20. Hoc vero cum omnibus innascatur & inhabiter tam in Paulo *regénito*, quam in Christum furibundo (etsi eandem in *fidelius* tyrannidem per gratiam Christi minimè exerceat) quid quæso erit *ἀποδείκνυσθαι*, Paulum idem probare *diversis mediis*, quorum alterum à se *non-*
dum

dum regenito, alterum à *regenito* usurpaverit? hac solum adhibita distinctione, quod nondum conversus *totus* erat Carnalis, *conversus* autem *ex parte tantum*, Carne concupiscente adversus Spiritum, & Spiritu adversus Carnem: ita tamen, ut superior in luctu Spiritus evadat. Verbo, loquitur Apostolus in toto hoc cap. 7^o. de Peccato non tantum Fidelibus, sed toti generis Humani massæ adnato, in eâque habitante ab ortu ad supremum usque diem. Unde perperam à quibusdam citantur veteres, ubi Paulum volunt hominem eo loci *indefinitè* describere, quasi scilicet exinde sequeretur Paulum *regenitum* excludi, & quasi à *specie ad individuum* arguere non liceret. Sive enim à *regenito* arguatur, sive non *regenito*, perinde est ad solvendam Apostoli questionem, v. 13. cum nec unum temporis intercurrit momentum, quo mortalium in hac vita *sanctissimus* vere profiteri cum Paulo nequeat, & debeat *Ego sum Carnalis*; uti postea fusiùs ostenderetur.

Cur autem Amicus Harmonista transitum talem ab uno statu ad alterum rem adeo absurdam pronuntiaret, non video, ni seipsum ejusdem *absurdi* damnare malit, qui partem priorem istius cap. comm. 25. ad Paulum *regenitum* accomodat, quod æquè absurdum.

Verba sunt ista, *Gratias ago Deo per Dominum nostrum Jesum Christum*. Hæc inquam interpretatur * Ipse de Paulo *regenito*, etsi totum reliquum antecedens de *irregenito* exponat, mox autem

Sic apud Jac.
Armin. in
Rom. 7. par. 2.

* Harmon.
p. 119.

autem in eundem irrogenitum recidere pronuntiat, istis verbis, *Ego igitur mente servo Legi Dei, carne autem Legi peccati.* Quænam hîc est coherrentia, quam à nobis tanto rigore exigit? Imo quam reperiet in versu proximè sequenti, c. 8. 1. *nulla igitur est condemnatio iis qui sunt in Christo Jesu?* cum secundùm Ipsum nulla talium occurrat mentio in toto cap. præcedenti, nisi tantum in brevi ista particulâ comm. postremi, *Ago gratias Deo, &c.* cum autem nobis objecerit particulam suam causativam, quid faciet istis, c. 8. 1. *deorum? nulla nunc igitur condemnatio.* Nunc igitur? cur quæso? unde hoc infertur? non à verbis cap. 7. postremis, ista enim ex illius mente ad hominem spectant irrogenitum: hoc autem revera absurdum, & valde abhorrens esset, ut nullam esse condemnationem Fidelibus & iis qui sunt in Christo probaret Paulus ex Statu eorum irrogenito, qui sunt extra Christum. An itaque Igitur istud referendum censet ad ultimi commatis partem solummodò priorem [*Gratias ago Deo, &c?*] at durum est ad verba quatuor aut quinque, quæ caput non claudunt, referri, quod cum toto capite reliquo (eoque satis prolixo) commune nil habet, imò neque cum proximè antecedaneis, in quibus idem omnino de se Paulus loquitur quod in superioribus, *Ego mente servo Legi Dei, carne vero Legi peccati.* Videat nunc Harmonista, quo Ipsius præcipitantia se duxerit,

Unde

Differ. poster.
2. 9. 116. 9.

Unde non est quod mox sequentia miremur, ubi dicit, *quod ergo objici soles de mutatione temporis*, v. 14. adeo leve est, ut meritò pudeat viros graves tali argumento pugnare. Itane verò? hem! An quenquam pudere debeat tempus præsens à præterito separare, maximè, ubi res ipsa postulat? Imo rationis ullam vel umbram ostendat, cur Paulus à præterito ad præsens delaberetur, ubi nihil prorsus ad institutum fecit. Si enim de se irrogenito sermonem deinceps continuat, quid opus erat, ut tempus mutaret? cur vel semel *Eram* dixit, non semper? Cur à versu 14. nunquam redit ad tempus *præteritum*? Hoc igitur adeò leve est, ut nihili facientes suo pondere non premat solum, sed opprimat. Leve videbatur Paulo nondum converso Legis onus, tam grave post sensit, ut sub eo ingemiscat, v. 24. *miser ego homo*, non qui *fueram*, sed qui *sum*, dum in luctâ contra carnem perpetuo versandum videt. Quique se in eadem cum Paulo luctâ necessariò per totum vitæ hujus curriculum exercendos haud agnoscunt, non est quod Christianorum nomine ac titulo superbiant.

Vers. 14.

Verum, inquit, *non erat conveniens*, ut Paulus diceret, *Lex erat Spiritualis*, sed ego eram *Carnalis*. Ita certè (quod priorem attinet sententiæ clausulam) non conveniebat Paulum *nugatoriè* loqui, cum Lex non erat modò, sed semper *sit spiritualis*. Nemo hominum, nisi nugator, dicet, ego *eram* homo. Satis tamen conveniebat Paulum

lum dicere, *Ego sum carnalis*, quia πῶς & aliquo sensu talis semper extitit, de quo statim.

Quin sententia, inquit, contraria sermonem affingit Apostolo non αἰσχρολογία modo, sed & sibi ipsi repugnantem. Absit. Quî vero? quoniam, scilicet, de homine hic descripto dicitur, *Ego sum carnalis*, v. 14. at de homine regenito dicitur, quod non secundum carnem ambulat, c. 8. 1. quasi vero carnalem esse (sive carnem habere, sensu Apostolico) & secundum carnem ambulare, idem sonarent, quæ αἰσχρολογία πῶς dissonant: iterum τὸ ἐν σὰρκι. Apostolus secundum carnem minime ambulavit, verè tamen dixit, *ego sum carnalis*. Ostendam quomodo, adhibita distinctione necessariâ, eâque satis perspicuâ. *Carnalis* enim dicitur aut interpretatione *Legis*, aut *Evangelii*; priore modo etiam sanctissimus in terris erit *carnalis*, quia quantacunque polleat sanctitatis gratiâ, minime assurgit ad *spiritualitatem* (ut ita loquar) *Legis*, quæ peccatum omne procul abigit, & *carnem* pronuntiat. Huc autem respexisse Apostolum, ubi se *carnalem* vocat, ex Textu patet: Lex, inquit, est *spiritualis*, ego autem sum *carnalis*. Ubi *carnalitas* ista (quam ibi loquitur) palam opponitur *spiritualitati*, sive (ut latiniùs dicam) *perfectiōi* *Legis*. Et quotusquisque obsecro, ab ista carnalitate, dum in terris degit, immunem se profiteri audeat? Cum Legem illam sua puritate usque adeo tremendam intuetur, quis cum sanctissimo Apostolo, non statim exclamabit, *Ego sum carnalis*? At sensu Evangelico carnales

Vers. 14.

sunt qui *secundum carnem* ambulant, i. e. qui ejus cupiditatibus faciles obsequuntur. Hoc minime de se dicit Paulus, hoc nulli faciunt verè Fideles.

Objicitur secundo, de Homine hic descripto dici, quod peccato planè *mancipatus est*, *instar eorum*, qui *venditione* totum traduntur in Domini *alicujus imperium & potestatem*. Verba sunt *πωμένος & τὸν αμαρτίαν*, venditus sub peccato, similitudine proculdubio à captivis in Bello desumpta, qui sub jugum missi. Illi autem non sunt *Servi voluntarii*, imò nihil magis quam libertatem seriò meditantur; unde Apostolus ad finem capitis, *quà me liberabit?* Ingemiscit utique vir sanctus sub istà peccati servitute, quod sensu Evangelico *carnalibus* minimè competere passim Scriptura docet. Sunt enim isti (quoad *intellatum*) *σλαβή* signari, 2 Pet. 3. 5. quoad *voluntatem* & affectus, *ἑαυτοὺς παρέδωκεν τῇ ἀμαρτίᾳ*, tradiderunt se ad patranda *omnem impuritatem usque ad excessum*, Eph. 4. 19. *iniquitatem trahunt fimbriis plauralibus*, & alia id genus innumera. An catenam suam ita trahit *captivus*, & *venditus* contra voluntatem? Aliud scilicet est *vendi*, aliud se *vendere*, quod de Achabo dicitur, (quem locum à Dissertatore huc trahi licet à paucis quoque aliis) mirum est. Reg. 21. 20. nam etsi 70. senes ita verterant, *ἐσθλὸν venditus est*, qui fontem tamen Hebraicum inspexerit *מכרתי*, videbit cum nostrà versione Anglicanà consentire [*he sold himself*] quod à viro veritatis studio minimè clam prættereun-

tereundum erat ; hoc enim sapit umbratilis magis *viſtoriae*, quam divinae *veritatis* curam. Paulus (quod Sancti omnes ad unum alii) *venditus eſt peccato*, nimirum à pravitate nativâ, ſed ipſi *involuntariâ*, quæ ad malum in ſingula fere momenta ſollicitat ; venditus eſt, *non ſe vendidit*. Quod autem ex Cap. 6 18. objicit Fidelem quemque *ſervum eſſe Juſtitiae*, verum agnoſcimus. Servus enim *voluntarius* eſt Juſtitiae, *involuntarius* peccati. Apoſtolus vero non dixit ſe ſervum eſſe peccati, ſed *venditum ſub peccato*, idque ut *captivum*, v. 23. nempe non erat ſervus *mercenarius*, aut *ultroncus*, ſed *coactus*, & ſub captivitate ſuâ *gembundus*, v. 24.

Jam ad *ratiunculas* illas (quas vocat) in contrarium pergamus. Objicere dicit Paræum de *Se* non de alio loqui Apoſtolum, quia continuat querelam de *Se* in primâ perſonâ per totos duodecim verſus, (hoc eſt, pluſquam *trigeſſes* ; (exiguus is autem fortasſe Diſſertatori numerus.) Quid ad iſta vero reſpondetur ? *Frigidum ſanè argumentum* ! præclare, & ſuo ſemper more. Sed cavendum eſt ei ne *frigidum* hoc argumentum mox adurat ſibi digitos. *Verba non movent viros, ſed ſenſus & argumenta*. Hic enim (quem opinatur) *vela quæquæ Paulo*, inquit, eſt *ſatis familiaris* ; imò neque ſemel quidem uſurpatus, uti mox patebit. Monendus eſt iterum Lector, pluſquam *trigeſſes* in eodem capite nexu planè continuo Paulum in *primâ* perſonâ loqui, ſed de alio inquit Diſſertator, de *impio*, & *irregenito*, non de *Se*.

Ille autem 4. aut 5. loca, *hic illic sparsa* studiosè colligit (quod alii ante fecerunt) in quibus eàdem figurà usum ostendit Apostolum. Perpendat ut vero Lector & memorià teneat quam in se suscepit provinciam; *Paulum scilicet alijs locis de se in primà personà loqui, quæ multum abest, ut viro sancto conveniant*: Hoc illi onus incumbit. Consultamus itaque loca, & vel lippi videant, quam bellè respondeant. Primus est, 1 Cor. 4. 6. *Hæc autem fratres mislaguarion in quatuor: i. e.* sumptà personà ad me transtuli. Quid autem transtulit? nempe quod capite primo questus est, (& Cap. 3.º quoad sensum repetit) voces illas, quibus partium studiosi in Ecclesià Corinthiaca, tum temporis utebantur, aut earum similibus, *Ego sum Pauli, ego Apollos, &c.* Hæc autem nomina, ut videtur, non usurpabant illi qui Schismati studebant, sed eorum similia, quæ reticere voluit Apostolus (ne majorem ipsis infamiam conciliaret) sed *ad se & Apollos mislaguarion* traducit: An vero hoc Apostolo non licuit? an de se aliquid pronuntiavit quod nisi viro impio convenire non potest? planè nihil.

Loc. 2.

Est ad Rom. 3. 7. *Si veritas Dei magis abundavit per meum mendacium ad ejus gloriam, cur ego quod peccati coarguor?* An verò dicit Apostolus *Se mentitum*, vel peccati *minus* de quo loquitur posse coargui? dicit vero, *Ego sum carnalis, venditus sub peccato, &c.* Scilicet ibi loquitur ex *suppositione* prava *inimicorum*, non ex *positione sua*, uti Textus & sensus communis apertè indicat.

Est

Est 1 Cor. 6. 12, 15. *Omnia (i. e. adiaphora) mihi licent, sed non omnia expediunt.* Quid autem hic dicit, nisi verum? at falsum est, si Dissertatori fides, Paulum de se loqui, *Ego sum carnalis, &c.* quod dicit tamen. Sic v. 15. *nunc sublata membra Christi faciam membra scorti? absit. i. e. monstrum hoc Sceleris.* Non hoc de Se dicit vir Sanctus, imo execratur; dicit vero, *Ego sum Carnalis.* Eodem spectant quæ, ex 1 Cor. 10. profert testimonia. Locus ultimus est, Gal. 2 18. *Nam si quæ destruxi rursus ædifico, transgressorem me facio!* ~~Quid?~~ Quis dubitat? nonne verum dicit? nonne idem dicat mortalium sanctissimus? Huc itaque fervidum redit Harmonistæ Argumentum contra frigidum Paræi: Paulus quater aut quinques (in variis sparsim Epistolis) in primâ personâ de se loquitur, quod *verissimum est*, nec à viro Sancto abhorret, ergo in eodem capite nihil impedit, quò minùs *trigesies*, & amplius, loquatur in eâdem personâ, quod de se *falsissimum* est, & soli impio convenire potest. Hic certè ipsius *rationis humanæ* potius quam verborum Pauli *Metaschematismus* meritò audiat.

Proxime urgetur à commate 90 *ἔμεις ὄντες, vivēbam ego aliquando, vel vivus eram* (uti Beza & versio * Anglicana magis ad sensum Pauli) *jme lege.*

Loc. 3.

P. 189.

* I was alive.

Locus fateor subobscurus, (in qualibus ludere solent Curiosorum ingenia) & suo per me sensu abundet unusquisque, modò ne trahatur ad excludendum Pauli de Se sermonem; nulla enim hoc postulat necessitas. Ego quidem (bonâ cum doctiorum

doctiorum veniâ) ad eorum sententiam accedo, qui non de lege *simpliciter*, sed *ut ita sit*, i. e. de lege apud irrogeniti Conscientiam *minimè* efficaci, nec sensu quo debuit *intimo & spiritali* intellecta; hoc enim *aquivalenter* idem est, ac *non esse* legem; non quod nulla sit *formaliter*, sed quod vim suam, quasi reverâ non esset, haud exerceat. Certè (præsens quod attinet institutum) de loci sententiâ non magnopere laborandum videtur, modo, uti diximus, Paulum *de se* loqui inconcussum tueamur.

Ad illud quod obijcitur à Paramo (aliisque passim Reformatis) velle *bonum*, nolle *malum*, odisse *peccatum*, non est nisi *renatorum*, ergo de se loquitur Apostolus, concedit Author Harmoniæ de voluntate *vehemente, absolutâ, & constante*, quam actionem *necessariò* post se trahere *largitur*: ait Paulum, ait, de *velleitate* loqui, *levique, & evanido boni desiderio*. Sed primò, voluntatem, quamvis *absolutam, & vehementem, necessario* secum trahere actionem, quotidiana refutat experientia. Potest enim in tali voluntate impedi-
menti aliquod intervenire, quo minus sequatur effectus. Nonne Petrus *absolutè & vehementer* bonum voluit, cum Christo dixit, *etsi tecum moriendum esset, non abnegabo te?* neque tamen secutus est effectus, nisi plane contrarius, ob intercurrentes nimirum *Carnis* (de quâ toties loquitur) tentationes. Diceretur fortasse ei defuisse *constantiam*: omnino, & ubi quæso *cis patriam* in Cœlis reperienda est *indefectibilis* animi constantia?

stantia? ubi voluntas ita numeris suis omnibus
perfecta, ut nusquam titubet, nusquam à bono
 defleat? certum est homines regenitos, *οὐκ ἔστιν ἡ
 πάλιν vehemente & absoluta* voluntate in bonum
 ferri; nec certum minus, cum ita vel maximè
 feruntur, *in multis labi*. Ea scilicet *concupiscentiæ*
 (quæ de sermonem ibi instituit Apostolus) Gra-
 tiæ *Rivalis*, & *ἑκαστοῦ* perpetua vis est. Imo ap-
 tissimum in homine regenito Paulinum illud de
 Se exemplum est, unde cognoscatur certiùs, quan-
 tum sit *naturæ* dissidium cum *Iustitiâ Legis*, (quod
 optimè ab eximio Theologo monitum!) Si enim
 ista fiant *in viridi arbore*, quid fiet *in arida*? Si
 Paulus, ipse tam insigne sanctitatis exemplar de
Carne queratur *rebelli* adversus Spiritum, facessat
 omnis de *Operum* Iustitiâ mussatio, & potius cum
 Psalmo harmoniam componamus omnes, *Situ*,
Domine observaveris iniquitates, quis stabit? Hinc
 etiam discant Cupiditatibus *immersi*, quæ spolia,
 quos de ipsis triumphos referat ista *caro* necesse
 est, quæ etiam cum Gratiâ in terris *maximâ* Marte
 experiri audeat, eamque * præliis assiduis exer-
 ceat.

* Quod Arria-
 nus in Epist.
 Homini possi-
 sumum viziofo

tribuit, id in hominem regenitum (ex mente Pauli) verius quadrabit. Πάν ἀμαρτήματα
 μάχην ποιεῖται: ἐπὶ δὲ τῶν ἀμαρτιῶν ἡ δίλη ἀμαρτία, ἀλλὰ καὶ ὁρῶσαι
 (quod de Inpiis nunquam dicit Scriptura) δὴλον ὅτι ὁ μὲν δίλην, ἡ ποιεῖ. l. 2. c. ult.
 verba postrema eadem cum Paulinis.

Quod verò Paulum ait de *volleitate* tantum,
 aut inclinatione ad bonum loqui, non ausim in
 ejus

ejus ire sententiam : probare autem exinde ni-
 titur, quia *non perficit quod vult*. Ecquis autem
 mortalium, quicquid *vult* boni perficit ? tum
 nemo sanè bonus quod malum est unquam fa-
 ceret ; atqui facit, idque in horas. Quod ait
velle & perficere inter se opponi, non capio ; ni
 forte *subordinata* malit *opponi* (hoc autem si vult,
 nunquam sanè *perficeret*.) Sic enim sequeretur,
 perfici opus bonum sine *voluntate*, cum tamen
 voluntas sit omnis actionis moralis *radix & prin-*
cipium. *Velle* itaque & *perficere*, non possunt esse
opposita. Imo neque *velleitas* sua (*quà talis*) oppo-
 nitur actioni ; quis enim affirmabit actionem non
 procedere, quia Petrus hoc vult ? *velleitas* autem
 est actio voluntatis, neque hactenus impedit,
 sed promovēbit effectum, si tamen *possibilem*.
 At verò quia languida tantum, & sine firmo *con-*
sequendi proposito, ideo finem non attingit. Vult
 Mævius Londini agens Lutetiam ire Parisiorum,
 quo sine Dubrim venit : illic vero itinerum per-
 tectus, & labante ex socordia animo, subsistit,
 neque pedem ulterius movet. Ecquis jam dicet
 profectionem istam (Dubrim usque) impedi-
 mento fuisse, quo minus totum iter absolveret ?
 Certe neque idem de voluntate debet, cum par-
 te itineris expedita, totius haud devoret labo-
 rem. In utroque Casu effectus quidem minime
 pertingitur, sed voluntas *simpliciter* non est in
 Causa ; imo *quousq;* progreditur, finem promovet.
 Quinimò si *velle & perficere oppositis* accensenda,
 neque Paulus ipse unquam perficeret bonum ;
 obstarēt

obstaret enim (quod mirum est) Ipsa *perficiendi voluntas* ; cum *oppositorum uno dato tollatur alterum* : Apostolus, uti ait, *discrimen* ponit inter τὸ θέλει, & κατεργάζεσθαι : quidni autem faceret, quod omnes *ratione utentes* faciunt ? At quid interim de *oppositione* ista concluditur ? num Illi omne *discrimen* statim *oppositio* audiet ? Quod vero supponit Apostoli τὸ θέλει, meram esse *velleitatem*, probandum erat ; quod cum non fecerit, imo neque attentarit, Totum erit *Petitio Principii*. Cum vero dicit *voluntatem vehementem* atque *absolutam necessario post se actionem trahere*, secundarum cogitationum hoc limam posceret, cum alia ad actionem omnem perficiendam præter nudam voluntatem requisita constat. Voluit Paulus *vehementer*, & *absolutè* ad Thessalonicenses iter facere, (*semel atque iterum*, inquit) 1 *Thes.* 2. 18. neque tamen *perfecit* ; non quod defuit voluntas, sed quod *impediret satanas*. Ita prorsus habet in *Regenitis* ; *volunt*, imo nihil magis, perficere bonum ; sed impedit *satanas*, obstat sæpe insidiator Iste Domi, Peccatum quod in eis habitat. Non distinguit Author inter voluntatem *vehementem* & *perfectam* (qualis est Sanctorum in Cœlis) quam semper actionem sequi concedimus. Sed alia res est Sanctorum voluntas in Terris, tot inter luctas & certamina, quibus ex *inhabitante peccato* jugiter exercetur. Cum autem venerit quod *perfectum* est, abolebitur quod imperfectum.

His itaque non obstantibus Paulus de Se sine

D

omni

omni metascematismo verissimè dicat, *Quod volo, bonum non ago.*

Idem quoque esto iudicium (ut cum Harmonista loquamur) de Odio Illo peccati, cuius meminit Apostolus. Odio habet vir Sanctus etiam Opera quæ subinde facit mala, proinde non vult voluntate *vehemente* atque *absolutâ*. Facit quod non vult, *i. e.* ex Hebraismo, quod summo odio prosequitur, ut cum de Deo dicitur וְיָרָא וַיִּשְׁמַח וַיִּשְׂמַח *non Deus [Tu] volens iniquitatem, i. e.* maximè averfari. Et quidem per odium exponit Apost. v. 15. Itaque tritum illud Medæ, *video meliora proboque*, à viro docto allatum, huc nihil facit; constat enim mulierculam istam sceleribus suis maximè infamem fuisse; & quamvis levi aliquo conscientiae singultu per intervalla laborabat (quod in flagitiosissimis subinde reperitur) in istam tamen, quam patravit, immanitatem plenis quasi velis provecctam, ex Euripide & Senecâ Tragædo notissimum. Hoc vero de Se inficiatur Apostolus (& merito) cum negat *Se esse* qui malum istud quod minimè vult facit, sed *peccato in Se habitanti* tribuit. *Esse Se* negat, ex parte scilicet potiori, ceu (ut vulgò loquimur) *regenerâ*. Ex binis etenim veluti elementis in hac vitâ contemperatur vir Sanctus, *Spiritu* nimirum & *Carne*, *Gratiâ*, & *Peccato* habitante; quæ cum *disjunctissimis* omnino (& quasi asymbolis) sint ingeniis, quod huic detrahendum, illis deputandum constat.

Unde parum movebunt cordatos istæ, quæ sequuntur

Isa. 5.

vers. 19.

quantur, ad *populum phalera*, ubi sic modulatur Harmonista; *Egregiam* verò laudem sic esse Regeneratum, ut *malum odio habeamus*, cum nulla nos perturbatio, nulla appetitus commotio ad id perpetrandum impellit, id vero statim ac mali committendi occasio se obtulit, nosque ad id impetrandum sollicitavit aliqua cupiditas, ex animo diligamus. Totum descripsi, ne forte læsæ sententiæ litem intenderet. Quam verò invidiosa & *invidiosa* omnia, utinam de integro expenderet. Quis enim Reformatus vel in somnis asseruit Regeneratum ex animo diligere peccatum? aut quæ, quæso, verba Paulina hominem probant ibi descriptum taliter affectum?

Si cum dicit, *quod noto malum ago*, huc scilicet redibit argumentum, *Qui facit quod ex animo odit, ex animo id diligit.*

Sed ita persona illic descripta facit peccatum. Ergo, &c. Nulla est talis Dialecticæ contrectatio. An Origenes cum persecutione Decianâ animo concidens thura Idolis adolevit (* si tamen ista boni commatis sit Historia) factum ex animo dilexit? aut ut propius paullo accedamus, cum Petrus ter abnegavit Dominum, an triste facinus ex animo dilexisse dicet? cum vero de peccato *inhabitante* tam contemptim loquitur, ut apud eum aliqua tantum cupiditas audiat, hortarer ut peccati istius maximè horrendi (reliquorum omnium fontis perpetuò ebullientis) naturam plenius edisceret.

Quod interrogat postremò, *Quis nescit hoc mali*

p. 192.

* Eusebius de hoc lapsu nil meminit, & vide sis Huetium Prefat. in Comment. Orig. l. 1. c. 4. num. 4.

mali odium non raro etiam in pessimis reperiri? Nos contra, Quis ulli unquam tali effato fidem faciet? Scripturas passim reclamare constat.

R. 194.

Instat ulterius contra quem disputat Adversarius, quod *consentire Legi Dei, & in eâ delectari sit Renatorum proprium.* Hoc autem personæ Isti Rom. 7. tribuitur, Ergo Paulus de Se loquitur.

Respondet Author Harmoniæ *consensum Legi Divinæ præbitum regentis cum irrogenitis communem esse; probâtque quòd alias nullum esset peccatum contra dictamen conscientiae.* Hoc autem si de omni consensu (ceu potius *assensu*) loquitur, inculcata erit consequentia. Interim tamen haud ita *festinandum* censemus. Nam etsi minimè negant Reformati (imò nec ulli, qui sensus communis beneficio utuntur) *aliqualem* Impiis inesse Legi consensum, diversissimum tamen agnoscunt in *Regentis*; quod *gnarum & amantem veritatis* in Re tantâ celare haud quaquam decuit. Hoc enim est omnia perturbare. Piorum consensus cum *delectatione* conjungitur, Impiorum cum *horrore & tristitiâ.* *Delector Lege Dei,* inquit consentiens Paulus; *amantem* autem Paulo dignius aliquid sonat, quam nudum *amorem* (neque voce istas ante Harmonistam probatus author Græcus confudit unquam.) Consentit vir bonus Legi, quod *bona* sit, idque secundum omnem bonitatis dimensionem, *honestæ, utilis, jucundæ*; consentit Impius non tam ob *bonitatem*, (certè non aut *utilem*, aut *jucundam*) sed ob *authoritatem*, qualemque nequaquam se posse effugere persuasum sub-

subinde habeat. *Amat Ille*, hic *timet Legem*. Hinc & præcipuè furda illa quibuscum (sudore diffuente) luctatur Impius, conscientia verbera, ex *supplicio*, quod ut Damocli gladium, Capiti Heb. 10. imminere sentit; vel, ut Apostolus, ab *horrenda quadam expectatione judicii*, non autem ex *pulchritudine & præstantiâ Legis*, quam in deliciis habere debet, & Pii habent. Hic videmus *distingui oportuisse consensum*, si Lucem (quod spero) meditetur Author, non tenebras,

Hinc autem exhibit Solutio ad ea quæ contra *delectationem* in Lege à Paulo, tanquam de SE, dissertantur, p. 195. Absit eum putemus distinguere nescire inter Delectationem *Piorum*, *solidam* illam, ac spiritualem, eamque *Impiorum*, & Hypocritarum, quam *spinarum* fasciculo in flammis crepitanti Scriptura confert, & ab alterâ diligenter secernit, ut cum gaudium *ineffabile & plenum gloria*, & quale Homini regenito eripere nemo queat; Gaudium inter *tribulationes*, 1 Pet. 1. 8. & seculi præsentis incommoda crescens (uti Rosa Joh. 16. 22, 24. inter Spinæ) describit, &c. ita ut istis immorari Rom. 5. 5. nihil sit necesse.

Quod de homine *interiore* & novo tanquam P. 196. adeo diversis, arguit, in eo magni nominis Theologos sibi adversantes nescire non potest. Eum certè *interiorem* hominem (quicumque demum fuerit) *carni* opponit Apostolus, & *legi in membris*, v. 18, 22, 23. Per *Carnem* autem sapissime *totam hominis naturam, quâ depravatam*, ex primo lapsu, intelligi in Scripturis, qui illas seridè & reverenter

verenter consulit, vix in dubium vocare poterit.

Quod genitum ex carne, caro est; quid ista caro nisi labes illa universalis, per primi lapsus contagium ex traduce derivata? non enim opinor hoc solum voluisse Dominum, quòd substantia corporea (sive carnea) generat corpoream: sed quod peccator peccatorem. Quid autem est Spiritus, nisi novæ creaturæ Parens? quidni itaque sit homo ille interior, idem cum Regenito? Frustra autem erit, si per membra hoc loco intelligat tantum corporea. Sic enim metonymicè dicuntur cupiditates quæcunque legi contrariæ, quarum veluti corpus est peccatum originale, cum eis utatur quasi corporis membrorumve ministerio. Hinc homo vetus corruptio dicitur, & Gratia renovans homo novus; quibus, ut corpori, membra proportionata per similitudinem aptat Apostolus: neque hoc diffiteri videtur Author Harmoniæ, p. 197. negat tantum veteris hominis reliquias in renatis veterem dici hominem, quin potius Corpus peccati completum cum omnibus & integris suis membris. De eo satis convenit, modò haud inficietur istas quoque reliquias simul sumptas totum esse corpus peccati habitantis semper in Fidelibus: non quod ullum in eis regnet peccatum, sed quod fomes & radix omnium in illis (ut diximus ex mente Apostoli) habitet & hæreat. Nam (ut hoc obiter adjiciam) si in renatis penitus aboleretur istud peccatum originale, non video unde oriretur actuale; rivus scilicet sine fonte. Hoc autem si res postularet pluribus

pluribus (ut opinor) facile manifestum fieret.

Probanda interim non est Harmonistæ Expositio de Luctatoribus istis, v. 23. quos statuit *Appetitum sensitivum*, & *Rationem sive Intell. Etiam*, *cognitione Legis imbutum*. Neque prorsus ignari sumus, unde hoc Interpretamenti hauserit, quod utinam à matre potius Ecclesiâ Anglicanâ reliquisque Reformatis mutuam accepisset. Pravum & effranem, uti videtur, habemus *appetitum*, sed *rationem* indubiè *Angelicam*, quæ in edomando sibi *appetitu* tota occupatur. Longe aliter Scriptura, quæ *Rationem* omnem *irregentam* in prava affectus non modò non hostili facit animo, quin cum eis adversus *Legem Dei* in *Societatem rebellionis* ultro venire moneat. Si hanc audimus, quid aliud *Intellectus Appetitui*, quam *Arbiter & Oeconomus Libidinum*? τίς σαρκὸς πειρώται ποίῳ μὲν & τίς ἐνδουλεύει, Rom. 13. ult. Quid nisi *cacitas*, Eph. 5. 8. & *tenebræ*? cui quæ Dei sunt, stultitia sunt, &c. 1 Cor. 4. 18. Caro itaque, maxime cum in *irregentis*, opponitur *Spiritui*, (sive Legi Spirituali) non *Appetitu* modo inferiore (quem πνεῦμα, & πνεῦμα dei appellare solent Stoici) sed *totam* naturæ corruptæ massam designat, tum ex Animâ *Sensitivâ*, tum *Intellectivâ* conflata: *Tota* siquidem ex se pugnat cum *Lege Dei*, cum tota sit corrupta. Mallem ista quidem de misellâ ratione nostrâ ex *Ethnico Pythagora* audire in Carmine (si tamen is Author fuerit)

Ἡρώδης γράμην εἶσας καὶ δουρεδὲν ἀείκων.

Nullum

Nullum Ille Affectuum *Aurigan* ratione aut fidiore, aut solertiore novit. Verum aliter, puto, Philosophandum est *Christianis* (quanquam isti quoque rationis *umbra* suus apud Illos quantuluscunque suo loco constet honos.) *Quid paleæ cum Tritico?* Scrutemur Scripturas, & caveamus, ne *Rebelles* inveniamur adversus Lucem.

Magnum vero aliquid addidisse sibi visus est fortasse Dissertator, si Rationem *cognitione Legis imbutam* intelligere se moneat: quasi nuda Legis *cognitio* in Irregentis (nam de his semper loquitur) talia in Ipsiis mira efficeret; cum Apostolus ad *malum* potius (*suâ Ipsorum pravitate*) irritare docuit, Rom. 7. 8. Gujus etiam triste nimis habemus documentum in Populo *Judaico*; quos, non obstante quam habuerunt *Lege*, * in os Ipsi obloquentes legimus, eamque horrendum in modum perpetuò violasse: quod etiam Deum severissimè ultum ad hunc usque diem certò novimus. Scrutemur, inquam, Scripturas, adeoque nostra Ipsorum *corda*, si his in Rebus sapere velimus.

Ad quintam quod attinet Adversariorum objectionem, cum de quo loquitur Paulus *ingeniscere* de suâ miseriâ, ob vim peccati desiderare liberationem, agnoscere & celebrare gratiam Dei per *Christum*, non esse nisi Renatorum; respondet ista ita non officere, ut *apertissimè* potius suam confirmant sententiam. Vix equidem credo; sed quomodo probatum dabit, nedum *apertissimè*, scire unquam posse despero. Quomodo inquam
aper-

* Jer. 44.
16, 17.

apertissimè confirmant? (nollemus enim in aperta luce cæcutire :) Apostolus scilicet, v. 24. addit exclamationem homini qualem antea descripserat, i. e. irrogenito, convenientem. Quid sequitur? Ergo scilicet regenito ista convenire nequeunt. Negamus consequentiam; multa enim communia habent regeniti cum irrogenitis, etsi quâ tales, & in specie, nihil. An homini regenito consentaneum non judicat Ds Harmonista, ingemiscere ob peccata, desiderare liberationem? &c. Absit. Ubi itaque est confirmatio illa apertissima? Suspensi tenemur. Sed quæ mihi videtur tota hoc syllogismo continetur,

Qui ea facit, aut dicit, quæ homini plane regenito possunt convenire (imò & semper conveniunt) Is pro irrogenito habendus est:

Ita descriptus, Rom. 7. Ergo.

Sed huc certe recidit apertissima sententiæ suæ confirmatio: & sic tandem à Scipione Africano confirmatam legimus Carthaginem.

Nec hilum juvabit prætextus hujusmodi ficulneus, posse nimirum quæ in prima personâ eo loci dicuntur, ad hominem irrogenitum accommodari (nam eodem sensu de facto convenire nunquam probabit.) Neque 2^o Domus ulla extructa est unquam Possibilitatibus istis generalibus. Verbo, à potentia ad actum affirmativè non valet argumentum. Possunt ista πῶς, & cum limitatione, convenire irrogenito; non sequitur, ergo conveniunt. Sed ne forte prædictum syllogismum, ut invidiosum, arguat, (qui tamen universam continet

Argumenti sui substantiam) in hanc, si lubet, formam variabimus.

Persona à Paulo descripta ingemiscit de peccatis, &c.

Vir, aliquis irreginitus ingemiscit de peccatis.

Ergo irreginitus aliquis est ea persona.

Hic (uti novit) duplex habemus virium in secundâ Figurâ, Propositionem scilicet particularem, & præmissarum utramque affirmantem, unde sanum nihil in conclusione sperandum. Nulla hætenus apertissima confirmatio.

Prætereundum verò non est quod ab Harmonistâ ingeritur, v. 2. *ευχαριστία* illam, v. 25. Homini irreginito bene convenire [Gratias ago Deo per Jesum Christum, &c.] sed paullo post corrigit sententiam cum mirâ suâ (nec sua tamen) *παρεστη* ad Paulum reginitum transferendâ eorum quæ ante *fidens* posuerat prorsus *eversoriâ*. Sed de hoc plura ad finem.

Quid verò dicendum ad argumentum istud *invictissimum*, uti vocat, quod in hoc syllogismo triumphat;

Status Hominis in hoc cap. descripti est status miserie, peccati, mortis, à quo, quicumque Christi sunt, liberantur.

At status Renatorum non est hujusmodi, ergo, &c. Occidimus! aures pepulit Asavors nostras,

— *ὁ μὲν ἐκ τοῦ βίου φρεσίν, ὁ δὲ πρὸς ἀλλήλ.*

Tota Propositio nil aliud est, quàm *Petitio Principii*, sumit enim pro *concesso* (sicque tenebras offundit Lectori) quod novit Adversarium minimè concedere, imò *ex professo* contrà luctari. Nos ita meliùs arguimus ex mente Ipsius Pauli, ut cuilibet probè attendenti constabit,

Status Liberationis à statu Peccati, Mortis, & Miseria, non est status Hominis Irregeneriti, Talis est status personæ ibi descriptæ, viz. à comm. 14. Ergo ibi descriptus non est Homo Irregeneritus.

Minorem ex parte fatetur Ipse, ex versu nimirum ultimo, cui proinde miram paravit *παράδοξον*, quanquam aliunde mutuat.

P. 199.

Quod de Statu *Miseriæ, Peccati, Mortis* habet, assentiri multa vetant. Nihil enim toto isto cap. à comm. 14. eum quem ibi describit Apostolus in tali statu esse æternum probabit.

An negabit Ipse se peccatorem esse? isto etiam nomine *miserum*, & mortem quoque in statu quo est, indies, imò & in horis commeritum? (Ego certè de me *mifero peccatore* negare ista non ausim.) An veto sequetur eum in statu *Peccati, Miseriæ, & Mortis* esse? Absit. Distinguendus erat Peccati status & *Miseriæ*, à Peccati & consequentis *Miseriæ Reliquiis* (quæ statum quidem *Imperfectiōis*, non propriè Peccati faciunt) quibus qui se non sentit laborare, Angelum se aut Sanctum Cælitem gloriatur. In hoc itaque suæ saltem parcat modestiæ.

Quod autem ad Pauli *ἐυχαιρίας* sive *gratiarum actionem*, commun. ult. notavit, minime prætereundum reor. Quid enim illic agit? nempe *dictas dat manus*. Nunc siquidem deposuit *larvâ & inani nomine*, quasi *ὁ νεκρὸς* (cū ex mortuo redivivum) *ἐν ἑαυτῷ* revera Paulum! unde verò tam improvise nobis vir Sanctus adest? nimirum latuit post *proscenium*, aut Authoris potius *παρρησίαν* (sive parenthesis) quam piget refellere. Verum nulla fors longa est; nam quasi intrasset Paulus (cum omni Reverentiâ dictum esto) *tantum ut exiret*, qui initio versus, velut *ἀνὰ μὲν ἄρξιν*, apparuit, in fine evanescit, estque idem (nescio quis) Paulus qui antea fuerat, si Dissertatori fides. Quin illico tamen cap. 8, v. 2. (uno scilicet tantum interjecto commate) rursus est *Ipse Paulus*, non *persona*. Hoc certè plus est quàm torquere *Textum*, torquet enim ipsum textus *Authorem*, ultrò citròque *agitatum*, quin & à se ipso *distractum*, ita ut ubi quiescat vir Sanctus, aut Ipse Ipse audiat, (tanquam *Sofias* in Fabulâ *Plautinâ*) vix inveniat.

Porro de objecto Adversariorum ex capitis conclusione [& quasi totius *Breviario*] desumptum, notentur verba, quæ hæc sunt. *Ἄγε ἰν' αὐτῷ ἐγώ*, Igitur Ego Ipse, *mente quidem servio legi Dei*, carne vero legi peccati. Hic enim non amplius est *ἐγώ* tantum (sicut in locis omnibus præcedentibus) sed adjecta demonstrativi pronominis *Emphasi*, *αὐτὸς ἐγώ*, *Ipse Ego*, quod certè de consilio Spiritus Sancti, eoque *speciali*, factum arbitror, quò

quo res (modò tamen hominibus *placere*) extra omnem *controversiæ* aléam poneretur. Hoc totum tamen à Dissertatore nullum aliud impetravit Elogium, quam *levicula Grammaticalis ineptiæ*, in qua tamen *ineptiâ* suâ falsum esse Patrum contendit. Non enim, inquit, necesse est ut *αὐτὸς ἴγῳ* reddatur, Ipse Ego, cum melius verti possit, *ille ego*.

Sed primò, nunquam (opinor) extra *fabulam* aut Drama reperietur *αὐτὸς ἴγῳ*, de alia persona dici, (imò neque *Ille Ego* initio *Æneid.*) nec metaschematismus suus Harmonistæ nostro hætenus successit, uti paulo ante demonstravimus.

Nec secundò, vel unum posse afferri exemplum credo, sive in *fabulâ*, sive *extra*, in quo *αὐτὸς ἴγῳ* reddendum sit *ille ego*, non autem *ego ipse*. Fateor mihi nullum omnino succurrere. Nam & pari quidem jure, vertantur *μουσῆ, μουσῆ* *mei illius, mihi illi*, sono auribus Latinis nec usitato, nec admodum jucundo. Imo si *ille ego* vertendum esset, multo (pace suâ) significantius, & à *solæco* securius dixisset Apostolus, *ἐγὼ ἴγῳ*.

Sed ne *leviculâ*, uti vocat, *ineptiâ*, & *triciâ Grammaticalibus* nimium immorari videamur, ad coronidem festino. Si hanc saltem de Paulo ibi Regenito sententiam ex *Absurditatum planè palpabilium* Barathro extraximus; quod recepimus, juvante Deo præstiterimus: Quod si causam quoque obtinuimus, universa corrui HARMONIAE fabrica, pronuntiante Ipso ad Fin. cap. 9. De hoc autem æqui judicent & cordati Lectores. Finem

Finem facio cum Voto (*ὡς μάλιστα*) ut Ecclesiæ nostræ Anglicanæ suus semper constet honos integer & illibatus, utque tali fælices Matre ab ejus obsequio nunquam desciscamus Filii, ejus immoti colamus Fidem, quæ etiam SEMEL *tradita est sanctis*: ut cuncta præ *magnis Dei veritatibus* ejusque *mandatis* minimi habeamus; satis esse reputantes vel *quicquid* esse in hoc mundo (*jacente in maligno*) modo ILLI Rationem *cum gaudio* (*ὅ* quali futuro !) non cum tristitiâ (*omnium atrocissimâ*) aliquando reddamus. Isque qui vel nictu oculi potest omnia, ratum jubeat hoc Votum, propter viscera misericordiæ suæ, dulcissimique SALVATORIS Merita. AMEN.

LAUS omnis TRIUNI DEO.

Syllabus Materiæ in Dissertatiunculâ.

*H*armonistæ præcipitantia Sententiam Suae adversam Absurditatibus planè palpabilibus laborare pronuntiantis. Pag. 1.

PELAGIUS illi favet. P. 2.

*P*ost exortum *Pelagium* *Augustinus* & *Hieronymus* *Harmonistæ* adversantur. *Hilarius* quoque *Nazianzenus*, & multi notî *Dôctores* ante *Augustinum* (Islo referente) P. 4.

De Origene, Chrysostomo, Theodorocto, cur aliter jenserint ratio probabilis assertur. P. 4, 5.

Aquinas noster est, *Salmero, Tererius, A Lapide, Estius, & Ipse Catechismus TRIDENTINUS.* P. 5, 6.

Ecclesia ANGLICANA iterum contra *Harmonistam.* P. 7, 8, 9.

Sententiam nostram Apostolo *απερδιουρον* *impingere incassum* jactat *Harm. Author.* P. 9. ad 13.

Mutatio Temporis probat *Paulum* de se semper loqui. P. 14.

Aliud Carnalem esse ex parte, aliud seculum Carnem ambulare. P. 15.

Locutio Illa [venditus sub peccato] *Harmonistæ* nil prodest. P. 16, 17.

Metaschematismi sui languor. P. 17, 18, 19.

De Clausulâ *Isâ,* quod volo non ago, &c. P. 20, ad 27.

De Homine interiore, & novo. P. 27, ad 30.

Mira Harmonistæ Argumentatio ex Vers. 24, 25. P. 31, &c.

Papædianus *sus,* (v. ult.) *vanitas.* P. 34, 35.

FINIS.

